



UPA 2026/25

28/4-2026

Napaartoq Isak Petrussen

Uunga siunnersuut: Takornariartitsinermik ingerlataqarnek aamma inuussutissarsiutigalugu ingerlatsinermi zonenut immikkoortiterineq il.il. pillugit Inatsisartut inatsisaata allanngortinneqarnera pillugu Inatsisartut inatsisaat

(Nunanut Allanut, Inuutissarsiuutinut Aatsitassanullu Naalakkersuisoq)

(Siullermeerineq)

Naalakkersuisut siunnersuuteqarnerinut qujanaq.

Inuiaqatigiinnik piujuarnerusussanik, imminullu napatinnerusussanik pilersitsinissami takornarialerineq pingaarutillit ilagaat. Takornarialerineq isumatusaartumik ineriartortikkaangatsigu pisorpiami suliffeqarfinnik, isertitanillu pilersitsiinnarneq ajorpugut. Inuussutissarsiummik siammasinnerusumik, patajaannerusumillu aamma pilersitsisarpugut. Siunissami atugarissaarnissaq qulakkeerusukkusigu, ilutigisaanillu aningaasaqarnikkut namminersornerput, niuerneramilu kiffaangissuseqarnerput nukittorsassagutsigit aalajangiisuuvoq.

Tamanna pillugu takornariartitsinermik inuussutissarsiorfimmi sinaakkutit allannguajaannissaat, siumut nalunangereernissaat, ilutigisaanillu ukiuni makkunani ineriartorneq takoriigarput iliuseqarfigisinnaallugu eqaatsuunissaat aamma pingaaruteqarpoq.

Inatsisip atornera pitsaanerulersinnissaa siunertaralugu, inuussutissarsiummillu ineriartortitsinermi siunertaangitsumik akornusiinnginnissaa qulakkeerumallugu, takornariartitsinermut inatsit siunnersuutitigut matumuunakkut arlalitsigut iluarsiisuteqarfigineqarpoq. Ilutigisaanik inuussutissarsiortut, najukkami inuiaqatigiit, pingortitallu akornanni eqqarsaatigisassanik erseqqinnerusitsinissamik, oqimaqatigiisitsilluarnerunissamillu allannguutit siunertaqarput.

Ilaatigut suliffeqarfiit najukkami tunngavissiinissaminut, inatsimmilu piumasaqaatinut naleqqussaaminnut periarfissagissaarnerussammata, piffissat immikkut akuersissuteqarfiusut sivitsornissaannik siunnersuut kinguneqassaaq. Massakkut piffissaliussat killeqarpallaarsimasut nalorninermillu pilersitsisimasut, tamannalu aningaasaliiniarnernik aamma ineriartortititsinissamut akimmiffiusinnaasoq misilittakkat takutippaat. Sivisunerusumik piffissaqaraanni pilersaarusiornissamut periarfissiilluarnerusaaq, inuussutissarsiummullu allannguajaannerusumik sinaakkutissiilluni.

Taassuma saniatigut inatsisitigut isumannaallisaaffigineqarneruneq, ingerlatsisunullu eqqugaasunut siumut nalunangereernerusumik pilersitsisoqarluni ilaatigut nunami allamiinnermut atatillugu immikkut akuersissuteqarnissamut malittarisassat ersarissarneqarlutillu iluarsineqarput. Ilutigisaanik sumiiffinni inoqarpallaangitsuni piumasaqaatit nalinginnaasut naammassineqarnissaat ajornakusoornera

UPA 2026/25

J.nr 00.00.00/26FM-LABU-00025

Qupp. 1



patsisaaginnarluni najukkami ineriartortitsinissamut periarfissaq annaaneqartussaajunnaarlugu, sumiiffinni takornarialerisoqarpallaanngitsuni immikkut ittumik akuersissuteqarnissamut periarfissaq ammaanearpoq.

Pinngortitami angalanerup, pinngortitamiinnerullu malittarisassiuunneqarnissaannut, matumani aamma aqqutini toqqakkani nalunaarsuinissamik, isernissamut uppersaateqarnissamut, sillimmasiissuteqarnissamillu piumasaqaatinik piumasaqaasiornissamut siunnersuut aamma periarfissiivoq. Tikeraanut isumannaallisaaneq annertusiumallugu, oqartussat upalungaarsimanissaannut tunngavissaqarluartikkumallugit, ilutigisaanillu pinngortitami sumiiffiit mianernartut illersorniarlugit tamanna pivoq.

Taamatut oqaaseqarlunga siunnersuut Demokraatit tapersorsorpaat, suliallu Inuussutissarsiornermut Aatsitassanullu Ataatsimiititaliami nangillugu oqaluserineqarnissaa inassutigalugu.